

Na osnovu člana 12. stav 1. tačka c. i člana 18. stav 1. tačka b. Ustava Kantona Sarajevo ("Službene novine Kantona Sarajevo", br. 1/96, 2/96, 3/96 i 16/97), Skupština Kantona Sarajevo, na sjednici održanoj 18. februara 2000. godine, donijela je

ZAKON

O MUZEJSKOJ DJELATNOSTI

I - OSNOVNE ODREDBE

Član 1.

Ovim zakonom uređuje se sistematsko istraživanje, prikupljanje, stručna i naučna obrada, čuvanje, zaštita i prezentiranje muzejskog materijala (u daljem tekstu: muzejska djelatnost) od značaja za Kanton Sarajevo (u daljem tekstu: Kanton), Grad Sarajevo (u daljem tekstu: Grad) i općine na teritoriji Kantona (u daljem tekstu: općina), nadzor nad zakonitostima rada muzeja i druga pitanja od značaja za muzejsku djelatnost.

Član 2.

Muzejski materijal obuhvata: proizvode prirode, proizvode ljudskog rada i duha, predmete, dokumente i druga svjedočanstva o pojavama i procesima u društvu, historijskim zbivanjima, kulturnom, naučnom, političkom, ekonomskom i tehničkom razvoju, životu i običajima ljudskih zajednica, životu i djelu istaknutih ličnosti, kao i druge predmete koji svjedoče o razvoju prirode i društva od prahistorije do danas.

Član 3.

Muzejska djelatnost je djelatnost od posebnog interesa za Kanton.

Član 4.

Muzejsku djelatnost obavljaju muzej i galerija (u daljem tekstu: muzej).

Za obavljanje muzejske djelatnosti može se oformiti muzejska zbirka.

Za vršenje izlagačke muzejske djelatnosti može se oformiti muzejska izložba.

Član 5.

Na muzej se primjenjuju odredbe zakona kojim se uređuje rad ustanova, ako ovim zakonom nije drugačije uređeno.

Član 6.

Muzejska djelatnost finansira se u skladu sa Zakonom.

Sredstva za osnivanje i rad muzeja, muzejske zbirke ili muzejske izložbe obezbjeđuje osnivač.

II - MUZEJSKI MATERIJAL

Član 7.

Muzej pribavlja muzejski materijal iskopavanjem, kupovinom, razmjenom, poklonom i zavještanjem.

Ugovor o kupovini, razmjeni i poklonu sastavlja se u pismenoj formi.

Član 8.

Muzej vrši obradu muzejskog materijala primjenom savremenih naučnih metoda.

Član 9.

Zaštita i korišćenje muzejskog materijala, kao dobra kulturne baštine vrši se u skladu sa odredbama zakona kojim se uređuje zaštita kulturne baštine.

Član 10.

Istraživanje i prikupljanje muzejskog materijala na teritoriji Kantona može se vršiti samo u saradnji sa Javnom ustanovom "Muzej Sarajeva" (u daljem tekstu: Muzej Sarajeva).

Ako istraživanje i prikupljanje muzejskog materijala vrši strano pravno ili fizičko lice neophodna je prethodna saglasnost kantonalnog ministarstva nadležnog za poslove kulture (u daljem tekstu: Ministarstvo).

Član 11.

Muzejski materijal se može rashodovati, samo ukoliko je izgubio muzeološku vrijednost.

Rashodovanje muzejskog materijala vrši se na prijedlog stručne komisije.

Komisiju za rashodovanje muzejskog materijala obrazuje Upravni odbor u skladu sa pravilima muzeja.

Član 12.

U slučaju prestanka rada muzeja, osnivač muzeja će odrediti muzej ili drugo pravno lice koje će preuzeti muzejski materijal muzeja koji prestaje sa radom.

III - MUZEJ

Član 13.

Muzej se osniva kao ustanova za obavljanje muzejske djelatnosti u svim oblicima svojine.

Član 14.

Muzej se može osnovati i početi sa radom ako je obezbijeđen odgovarajući muzejski materijal, prostorije i oprema za obavljanje muzejske djelatnosti, potreban broj stručnih muzejskih radnika i sredstva za osnivanje i početak rada muzeja.

Uslove iz stava 1. ovog člana utvrđuje kantonalni ministar nadležan za poslove kulture (u daljem tekstu: ministar).

Član 15.

Muzej može trajno obavljati djelatnost ako ispunjava uslove utvrđene Normativima i standardima za muzejsku djelatnost, u skladu sa zakonom kojim se uređuje finansiranje ustanova.

Uslove iz stava 1. ovog člana muzej je dužan da ispuni najkasnije u roku od pet godina od dana početka obavljanja

djelatnosti.

Član 16.

Muzej:

istražuje, prikuplja i obrađuje muzejski materijal,

čuva muzejski materijal od oštećenja, uništenja i nestajanja,

obezbjeđuje mjere zaštite muzejskog materijala, posebno za vrijeme ratnog ili vanrednog stanja,

obezbjeđuje korišćenje muzejskog materijala u kulturne, naučne, vaspitno-obrazovne i druge svrhe putem njegovog prezentiranja u okviru stalnih ili povremenih izložbi i na drugi način,

omogućava naučnim i stručnim radnicima proučavanje muzejskog materijala,

brine se o čuvanju i održavanju muzejskog materijala koji se nalazi van muzeja na području na kojem obavlja svoju djelatnost,

obavlja naučnoistraživački rad u skladu sa zakonom,

objavljuje rezultate svog stručnog i naučnoistraživačkog rada putem vlastitih publikacija i na drugi način,

ostvaruje saradnju na području Bosne i Hercegovine i međunarodnu saradnju u oblasti muzejske djelatnosti,

obavlja i druge poslove utvrđene zakonom i pravilima muzeja.

Član 17.

Organ upravljanja u muzeju je Upravni odbor.

Pored poslova utvrđenih zakonom kojim se uređuje rad ustanova, Upravni odbor:

odobrava projekte iskopavanja, istraživanja i prezentacije muzejskog materijala,

daje saglasnost na razmjenu muzejskog materijala,

nalaže preuzimanje posebnih mjera za čuvanje i zaštitu muzejskog materijala.

Član 18.

Rukovodni organ u muzeju je direktor muzeja.

Za direktora muzeja može biti imenovano lice koje ima visoku stručnu spremu iz oblasti kojom se muzej bavi i istaknuti je stručnjak u muzejskoj djelatnosti, naučni ili kulturni radnik.

Član 19.

Muzejsku djelatnost obavljaju muzejski radnici koji imaju odgovarajuću stručnu spremu i stručno zvanje.

Propis o stručnim zvanjima, uslovima i načinu sticanja stručnih zvanja u muzejskoj djelatnosti donosi ministar, po prethodno pribavljenom mišljenju Muzeja Sarajeva.

Član 20.

Svako ko ima muzejski materijal može osnovati muzejsku zbirku ili muzejsku izložbu.

Odredbe ovog zakona shodno se primjenjuju na muzejsku zbirku i muzejsku izložbu, ako se osniva kao ustanova.

Član 21.

Muzejska zbirka istražuje, prikuplja, stručno i naučno obrađuje, čuva i prezentira muzejski materijal.

Muzejska izložba prezentira muzejski materijal koji se odnosi na određenu temu, period, djelatnost, događaj, instituciju ili ličnost.

Član 22.

Muzeji se, radi obavljanja poslova od zajedničkog interesa mogu udruživati na osnovu ugovora u zajednicu muzeja ili drugi oblik udruživanja.

O udruživanju iz prethodnog stava odlučuje Upravni odbor muzeja.

Član 23.

Muzej obavještava javnost o programima istraživanja, stalnim i povremenim izložbama i značajnim otkrićima, na način utvrđen pravilima muzeja.

Član 24.

Muzej vodi sljedeće evidencije: ulaznu i izlaznu knjigu, knjigu inventara, knjigu poklona, kartoteku i fototeku muzejskog materijala.

Propis o sadržaju i načinu vođenja evidencija iz prethodnog stava donosi ministar.

IV - MUZEJ SARAJEVA

Član 25.

Muzej Sarajeva nastavlja rad kao javna ustanova koja obavlja muzejsku djelatnost u javnom interesu Kantona.

Prava osnivača prema Muzeju Sarajeva vrši Skupština Kantona Sarajevo.

Član 26.

Muzej Sarajeva, pored poslova utvrđenih u članu 16. ovog zakona, saraduje sa drugim muzejima na području Bosne i Hercegovine radi obezbjeđivanja i podsticanja jedinstvenog obavljanja matičnih poslova muzejske djelatnosti prema međunarodnim standardima i radi uvezivanja u međunarodna muzejska udruženja.

Član 27.

Muzej Sarajeva obavlja matične poslove za muzeje koje na području Kantona Sarajevo osnuju Kanton, Grad i općine kao i druga pravna i fizička lica u skladu sa odredbama ovog zakona.

Matični poslovi su:

vođenje kataloga muzejskog materijala za područje Kantona Sarajevo;

razvijanje i unapređivanje stručnog rada muzeja u djelatnostima za koje je Muzej Sarajeva registrovan;
obavljanje stručnog nadzora i pružanje stručne pomoći;
staranje o stručnom usavršavanju muzejskih radnika.

Član 28.

Muzeji su dužni da odgovarajućem matičnom muzeju dostavljaju obavještenja i podatke potrebne za obavljanje matičnih poslova.

V - NADZOR

Član 29.

Nadzor nad zakonitošću rada muzeja vrši Ministarstvo.

Nadzor nad provođenjem odredbi ovog zakona i propisa donesenih za njegovo provođenje vrši Ministarstvo.

VI - POSLOVI LOKALNE SAMOUPRAVE

Član 30.

Grad i općine sa teritorije Kantona vrše na svom području poslove iz samoupravnog djelokruga koji se odnose na:
osnivanje muzeja, muzejske zbirke ili muzejske izložbe od interesa za Grad, odnosno općinu;
nadzor nad zakonitošću rada nad muzejima čiji su osnivači.

VII - KAZNENE ODREDBE

Član 31.

Novčanom kaznom od 500 do 5.000 KM kaznit će se za prekršaj muzej, ako:

1. ne zatraži prethodnu saglasnost za istraživanje i prikupljanje muzejskog materijala koje vrši strano pravno i fizičko lice (član 10. stav 2.);
2. rashoduje muzejski materijal suprotno odredbi člana 11. ovog zakona;
3. ne vodi ulaznu knjigu i izlaznu knjigu, knjigu inventara, knjigu poklona, kartoteku i fototeku muzejskog materijala (član 24.);
4. ne dostavi matičnom muzeju obavještenja i podatke potrebne za obavljanje matičnih poslova (član 28.).

Za prekršaj iz stava 1. ovog člana kaznit će se i odgovorno lice u muzeju, novčanom kaznom od 100 do 1.000 KM.

VIII - PRELAZNE I ZAVRŠNE ODREDBE

Član 32.

Muzej Sarajeva dužan je da uskladi svoju organizaciju i djelatnost sa odredbama ovog zakona i donese pravila muzeja, u roku od šest mjeseci od dana njegovog stupanja na snagu.

Osnivač Muzeja Sarajeva dužan je da obezbijedi uslove za trajno obavljanje djelatnosti, u roku od pet godina od dana stupanja na snagu ovog zakona.

Član 33.

Ministar nadležan za poslove kulture obavezan je u roku od 30 dana od dana stupanja na snagu ovog zakona donijeti propise iz člana 14. stav 2., člana 15. stav 1., člana 19. stav 2. i člana 24. stav 2. ovog zakona.

Do donošenja propisa iz prethodnog stava ovog zakona primjenjivat će se:

Pravilnik o uslovima za osnivanje i početak obavljanja djelatnosti muzeja i galerija ("Službeni list RBiH", broj 2/94);

Pravilnik o sadržaju i načinu vođenja ulazne i izlazne knjige, knjige inventara, knjige poklona, kartoteke i fototeke muzejskog materijala ("Službeni list RBiH", broj 2/94);

Pravilnik o stručnim zvanjima, uslovima i načinu sticanja stručnih zvanja u muzejskoj djelatnosti ("Službeni list RBiH", broj 2/94).

Član 34.

Danom stupanja na snagu ovog zakona na teritoriji Kantona prestaje primjena Zakona o muzejskoj djelatnosti ("Službeni list RBiH", br. 13/93, 20/93 - ispravka i 13/94) na muzejsku djelatnost utvrđenu ovim zakonom.

Član 35.

Ovaj zakon stupa na snagu osmog dana od dana objavljivanja u "Službenim novinama Kantona Sarajevo", a primjenjivat će se po isteku roka za donošenje propisa iz člana 33. ovog zakona.

Broj 01-02-54/00 18. februara 2000. godine Sarajevo

Predsjedavajući Skupštine Kantona Sarajevo Mirsad Kebo, s. r.